

左恪靖侯奏稿續編

恪靖奏稿續編卷六目錄

奏擬條梁收復米脂榆林擊退竄賊摺

奏宜君縣被陷收復片

奏吉林馬勇抵陝擬從新整理摺

奏催解四川河南山西鉛礮片

奏擒竄北山現籌勦辦摺

奏擒逆分股狂奔截勦疊勝摺

奏各軍勦回獲勝甯州解圍正甯等縣甫失旋復摺

奏和厚兩營失利遏稔東竄摺

奏騎賊闌入安塞片

覆陳甘肅餉事通籌陝甘全局摺

奏陝甘撫局勢難敷衍片

奏遵

旨覆陳摺

奏凝條梁收復米脂榆林擊退竄賊摺

奏爲查明凝條梁被賊闖入旋即收復米脂榆林各府縣擊退撲城之賊據實馳陳仰祈

聖鑒事竊凝條梁鎮被賊陷踞行查敦奇祥阿各軍實在下落經臣等先後馳陳九月十七日據凝條梁巡檢李夢蘭申報八月初二日夜半探報距梁西南四十里泥梁子有回匪竄擾駐梁之統帶黑龍七起官兵記名副都統敦奇祥阿副將銜儘先游擊蕭明發共圖守禦蕭明發分堵西南三口敦奇祥阿分守東南三口初三

日辰刻大雨馬賊二千餘步賊七八百蜂擁而來蕭明發督隊轟擊馬賊從東南巷衝焚殺搜搶敦奇祥阿不能禦蕭明發所部帶傷甚多遣人求援於敦奇祥阿不應適記名副都統薩斌圖率馬隊數十蒙兵數百名馳來策應蕭明發與合隊衝擊賊始敗退凝條梁初四日已刻賊復來撲營蕭明發禦之南街駐安邊之營總叅領托雲佈聞警馳來同薩斌圖各率所部馬隊衝擊追殺十餘里殺賊數十名奪回器械牲畜甚夥是夜托雲佈仍回安邊初六日駐紮定邊之記名副都統貴陞帶

兵到凝條梁人心始定此凝條梁被賊闖入並未盤踞之實在情形也其攻撲米脂榆林府縣城池之賊八月初七日竄擾米脂龐家一帶初八日辰刻騎賊數百直撲縣城知縣張守基督圍守禦賊知有備未敢近逼初九日黎明賊馬步千餘復撲西南北三門城上鎗礮轟擊斃騎馬賊數名賊即退卻已刻延榆綏鎮陶茂森派署左營游擊楊樹棠帶兵自南路趕到城中團練亦啟東門出戰賊向西北沿山而竄十三四等日擾及榆林縣南之鎮川魚河等堡十五日馬步賊由東南而來分

兩路撲城城上鎗礮轟擊賊卽卻退十六日已革游擊
李允芳由米脂追賊而來已抵下鹽灣榆林縣知縣嚴
書麟會同署中營游擊牛玉林率兵勇出城會剿敗賊
於歸德堡賊遂西竄懷遠縣境適李允芳帶前隊行抵
魚河堡西南遇賊龍耳岸後隊續至擊敗之賊竄米脂
懷遠交界之武家坡白家岔一帶懷遠縣知縣劉昌蕃
率鄉勇扼之馬道崑賊仍回竄小里河石灣等處二十
七日有賊千餘竄至石雲坪帶勇童生劉方軌孔昭勛
等及團紳魯述周方守正等率團勇擊之賊敗回石灣

劉方執孔昭勛等蹶躑緊追二十八日抵卧牛城前起
圍勇截其去路後起馳至夾擊斃賊數百奪獲駝騾十
五隻驢一百一十餘頭馬十九匹羊一千三百餘隻洋
鎗三桿鳥鎗二十餘桿旂幟六十餘件搜獲江湖哥老
會盟單驗視皆兩湖江西川黔勇丁從甘肅潰回者此
米脂榆林先後擊退撲城賊匪懷遠圍勇截勦竄賊之
實在情形也臣等竊維陝西北山之賊均由甘肅而來
固原土匪及各飢潰勇丁相與勾結間有回匪夾雜其
中馬賊多而步賊少四出剽掠踪跡飄忽幸皆無甚伎

倘地方文武能憑城固守將弁肯盡力勦截不難就地
殲除惟其地邊遠荒瘠迥殊內地營兵餉匱已久名存
實亡客軍遠道援剿不能隨地徵糧轉饋則勞費萬狀
仍難剋期必至非俟大局粗定不能全力注之此時兵
事餉事實難兼顧然揣度情形尙不至遽貽晉邊之害
也凝條梁之變亦多係土匪潰勇勾通回匪所致僅祇
被闖入劫掠旋即擊退並未盤踞因地居邊外傳聞異
詞故文報每多失實現有官軍鎮壓當無他虞臣宗棠
前調記名提督劉厚基由延川取道綏德米脂馳往剿

辦現在地方收靜毋庸前往仍飭其暫防宜君白水一帶以重廊防而預遏捻逆北竄之路其米脂綏德榆林守城擊賊各文武官紳容臣等核明彙案酌保數員懇恩獎勵其擬條梁帶兵各員功過攸分應由穆圖善查明辦理謹據寶馳陳伏乞

皇太后

皇上聖鑒訓示謹

奏 同治六年十一月初一日

奏宜君縣被陷收復片

再記名提督劉厚基自肅清延鄜交界各縣後駐軍鄜州八月初二日忽接探報土匪兩三千自甘肅合水縣竄至劉厚基卽帶隊往剿行至羌村適與賊遇賊見官軍倏至駭而奔劉厚基追至山峽縱兵擊之擒斬五六百名奪獲騾驢馬匹數百餘匪仍由孤掌窪竄回老巢初四日接洛川縣報回逆二千餘由中部縣境渡惠家河而來所部駐防中部之總兵張榮華探悉竄中步之賊約兩股其由宜君縣苦泉坪楊家店焦家坪竄來之賊尙在後未至均甘肅甯州回逆也適連日大雨山水

暴漲不能拔營十八日啓行至交口阻水不前二十日渡河二十一日途次接張榮華稟報是日出隊至四聖村遇騎賊千餘鏖戰竟日擒斬二百餘奪獲牲畜軍械旗幟甚夥二十四日劉厚基馳至牛湖嘴與賊僅隔一溝是夜踰溝潛襲各堡之賊斃賊百餘二十五日督隊踰溝甫上山梁該逆卽分數股前來抗拒劉厚基分三路衝擊更番接仗廩至半日斃賊頗多而賊仍不退乃用開花礮轟其中堅賊始大潰官軍乘之殲賊約數百名生擒百餘名奪騾馬牛驢數百頭追至厚子坪始行

收隊餘賊仍由雙柳竄回老巢訊據生擒回逆劉元賽
文志等供如此次由甘肅甯州竄來回逆共兩股此股
係馮正剛爲首回中呼阿渾者也尙有一股係余阿所
帶已由楊家店焦家坪竄犯宜君矣劉厚基訊決後卽
傳令援隊援宜君二十六日行至中途聞宜君縣城已
於二十五日辰刻被賊闖入知縣張杰遇害賊偵官軍
將至旋即由楊家店退向甯州老巢去矣劉厚基二十
七日未刻馳抵縣城廩生屈朝海王家駿襄利見來訖
知署宜君營叅將花翎都司秀順典史胡光照馬蘭巡

檢徐廷俊等均尙在城隨卽遣覓秀順則遍體刀矛重傷偃卧北門城樓不能起立細詰失陷之故因久雨城垣坍塌十三處約共二百餘丈知縣張杰稟請修築適連日陰雨尙未開工而賊已迫近張杰因縣無存糧不肯請兵惟募馬蘭勇丁百名入城防守勇首郭大順暗與回通引回逆由缺口闌入回逆入城搜掠財物旋即倉皇遁走劉厚基留張榮華一營駐守捕治叛勇正法此宜君縣城被回逆闌入旋即收復之實在情形也臣等查宜君縣城素稱苦瘠八月以來大雨兼旬城垣坍塌

比過甚當回匪竄撲時知縣張杰因無糧供應未及請
兵叛勇內應遂致被賊闖入比劉厚基聞警馳至則已
無及宜君縣知縣張杰被戕情形甚爲慘烈應請

旨飭部照例議卹以慰忠魂署宜君營叅將都司秀順
櫻城固守身受刀矛重傷二十餘處比劉厚基馳至秀
順尙在北門城樓實與尋常營員失守迥異應請

旨革職暫留署任以示區別其餘文武應歸另案查辦
所有宜君縣城池被賊闖入旋即收復情形謹據實附
片馳陳伏乞

皇太后

皇上聖覽施行謹

奏同治六年十月初一日

軍機大臣 字寄同治六年十月初七日奉

上諭左宗棠等奏查明凝條梁收復米脂榆林擊退賊
匪並宣君縣城失守後收復情形各摺片凝條梁被賊
攻撲闌入街巷敦奇祥阿不能抵禦蕭明發請援時又
不能救經薩斌圖等奮力衝擊賊始敗退本日已諭令
穆圖善將該員等功過核寔查明分別奏辦矣米脂榆

林撲城之賊雖經陝省兵勇擊退惟北路餘匪尙未殄
盡左宗棠等當督飭地方文武寔力殲除不可稍存大
意宜君城垣於失守後經劉厚基馳往收復惟陷城之
賊並未被剽先期遁歸甯州難保其不去而復來與捻
匪勾結著左宗棠喬松年分派兵勇於郟延交界一帶
嚴密扼截毋任回竄宜君縣知縣張杰臨難捐軀殊堪
憫惻著交部議卹都司秀順被傷甚重著革職留營免
其議罪左宗棠另摺奏新募吉林砲手冗雜不堪應用
等語此項馬隊沿途逃逸甚多馬匹亦多倒斃本日已

明降諭旨將原募草率之富明阿議處矣其帶兵之員沿途未能約束亦難辭咎著左宗棠查明叅處現在存營勇丁仍著該大臣酌挑選擇其尙堪適用者留營訓練其餘概行裁撤責成派出之員管帶回旂毋任仍前逃逸陝省剿捻情形現在若何著該大臣隨時馳奏以慰厯係將此由六百里各諭令知之欽此

奏吉林馬勇抵陝擬從新整理摺

奏爲吉林馬勇齊抵陝省現擬從新整理恭摺馳陳仰
祈

聖鑒事竊臣前奏調吉林破手二千五百名帶解察哈爾採購馬三千匹入陝助餉荷蒙

聖慈俞允七月二十八日潼關營次欽奉

寄諭長善奏吉林現募赴陝勇丁良莠不齊請飭左宗棠等密查等語吉林應募勇丁本非實業獵戶現據長善聲稱內多直隸山東游民永平府屬又居其大半沿

途逃散頗多進關以後潛逸吏眾恐有馬賊餘黨錯雜
其間此次勇丁到陝後應如何約束駕馭俾無生事之
處著左宗棠妥慎籌辦欽此跪聆之餘深爲失望是日
馬勇頭起至潼關八月初九九月初四初九十一等日
後四起始陸續入陝臣於潼關及臨潼營次接見吉林
將軍富明阿所派副統領常林正統領桂廉各起營總
札蘭員詢知馬匹沿途倒斃及病癘寄養各州縣報斃
者數逾一半現僅存馬千餘尙陸續報斃勇丁二千五
百名除沿途逃走數百名現到陝省者破手不過四百

有奇此外老弱疲乏吸食洋烟不習騎者不知其數聞
各營總在途亦有收留補缺者臣見其不堪赴戰暫令
駐紮省關先委已革都統銜前護軍統領常星阿點驗
分別等第俟臣奏派分帶之記名副都統喜昌到營再
令與常星阿妥籌辦理長善所奏慮其良莠不齊致添
馬賊具見其顧全大局深心惟臣所苦者富明阿所募
勇丁既如此冗雜不堪是非駕馭約束之難而從新整
理汰留訓練之尤難也詢據各營總僉稱吉林將軍副
都統派充營總時並未令隨同選募所有勇丁均係臨

時招湊派歸管帶迫促登程數日後始將勇丁花名冊發給不但良莠難分卽姓名籍貫真假亦未及查認

臣

昨訊決搜搶民人財物之吉林二起馬勇崔萬三遍查冊籍並無其名再四研訊始知卽冊名之崔保山卽此可見原募之草率至軍裝一項尤關緊要現五起勇丁所携器械均不適用鞍鐙粘屨亦不齊全及閱所造送軍裝冊內湊列抬鎗一項尤非馬隊所需遠道携將徒滋重累夫以數千里外徵調之軍糜十餘萬兩至艱之餉竭沿途數十州縣供億之力而乃得此二千有奇冗

雜疲乏不堪征戰之卒現在坐食需費將來汰遣需費
當茲糧餉奇絀之際何以堪之富明阿昔肯稍爲盡心
庸遽謬率至此况前奉

諭旨儘數挑選不必拘定二千五百名之數細心訪查
不可以無業游民充數致滋流弊

明訓洞燭幾先尤當懍遵乎臣與富明阿未曾共事前
頗聞其在江南軍營時性情乖謬故此次請調吉林礮
手懇

飭德英一手經理富明阿或因此心存芥蒂惟既銳以

自任自當以軍務爲重豈宜操以輕心此則不能爲富
明阿解者也所有吉林馬到陝日期及從新整理難以
趣戰寔在情形謹據寔直陳伏乞

皇太后

皇上聖鑒訓示謹

奏 同治六年十月初一日

同治六年十月初七日內閣奉

上諭左宗棠奏吉林馬勇齊抵陝省現擬從新整理一
摺吉林所募馬隊必途逃散甚多人頗冗雜不但良莠

難分卽姓名籍貫多致舛錯軍械鞍轡亦不齊全吉林
將軍富明阿辦理草率著交部議處欽此

奏催解四川河南山西鉛礦片

再上年十二月奉

諭旨飭四川趕辦黑鉛十二萬觔由陝省委員前往接
運嗣經員委往領迄今尙未報解又河山西各協陝省
硫磺每月五千觔自四年九月起截至本年九月止河
南欠解十二萬觔山西欠解七萬觔鉛磺兩項陝省素
不出產現值攻剿喫緊之際需用尤殷陝局往往因鉛

礦缺之停工待造臣軍所需向由鄂省後路糧台購料製造因水陸程途迢遞二千餘里轉運極艱寔難如期解濟亟應由陝省就近製造俾免缺乏相應請

旨飭下四川河南山西督撫臣將欠解陝西鉛礦迅速如數辨解並河南山西兩省將以後應解鉛礦勛按月批解以資配造而利攻勦謹附片陳明伏乞

聖鑒施行謹

奏同治六年十月初一日

軍機大臣 字寄同治六年十月初七日奉

上諭左宗棠奏請飭催欠解鉛礪等語本日據駱秉章奏應解陝省黑鉛二十萬觔業已如數撥解惟河南山西每月應各協陝省硫礪五千斤自四年迄今河南上欠解十二萬斤山西欠解七萬斤陝省現值攻剿吃緊之際需用尤急豈可令鉛礪缺乏停止待造著李鶴年趙長齡卽將欠解陝西鉛礪迅速如數辦解並將以後應解礪斤按月批解不准再有宕延左宗棠於鉛礪解到後卽著趕緊製造以利攻剿將此由五百里各諭令知之欽此

奏擒竄北山現籌剿辦摺

奏爲官軍大舉逼圍擒逆竄入北山現籌剿辦情形恭摺馳陳仰祈

聖覽事竊自八月二十六日以後擒逆由三原富平之閒渡擾高陵及臨潼渭南各縣北岸各村堡雨後零騎四出覓食兼窺河岸大股未得竄動官軍苦爲雨阻亦未克進兵九月初一初二初六等日大雨不止軌轍不通薪糧告匱臣宗棠檄主客各軍之在西路者先就涇河西岸浚濠削坂杜賊回竄之路十一日輕騎赴涇西

各軍面與臣劉典廣東陸路提督劉松山安徽壽春鎮
李祥和前提督銜記名總兵郭寶昌甘肅提督高連陞
按察使銜陝西補用道黃鼎商議方略以提督蕭德經
總兵羅洪德于奇泮副將王其發參將劉竹田游擊劉
德良各營與黃鼎一軍分扼涇河西岸北自白陵谷山
脚起迤東而南至涇河入渭處止又飭提督劉效忠一
軍扼耀州山口皆倚山憑水築壘浚濠以重後路營壘
甫成臣劉典卽與劉松山李祥和郭寶昌高連陞各軍
渡涇進剿十四十五十六等日大雨傾注官軍冒雨覓

渡三日始渡畢臣宗棠於十五日回臨潼營次臣劉典與高連陞兩軍十六日齊抵高陵劉松山李祥和郭寶昌亦至三原賊見西路各軍進逼大股潛移臨潼渭南富平蒲城交界之瀾鹽灘游騎自臨潼北岸至華州北岸上下窺伺見南岸防軍嚴密勢難偷渡乃圖拚死衝突復向西竄二十二三等日臣劉典復與高連陞復由雨金鎮進紮相橋康橋一帶賊騎倏前倏後時相窺擾比官軍出隊排擊則復鼠竄而去劉松山李祥和郭寶昌各軍同時由北面進駐富平自二十一日至二十六

日大雨以風官軍不能遽進乃修浚雷村順陽河牛村
母豬河康橋一帶水陸墻濠於富臨屬境設第二重關
鎖賊見西路官軍日逼度不得脫遂鋌而走險二十七
日雨止遂由蒲城東南一帶北趨北水竄入北山臣劉
典與高連陞率所部趨耀州前隊甫抵同官賊騎已薄
中部矣先是臣宗棠以北山荒瘠殊甚非賊所注意特
慮被剽窮竄或冒險深入檄提督劉厚基鄜防各軍南
下截之頃據劉厚基馳報十月初三日中部擊賊初四
日洛川擊賊皆獲勝仗現在賊蹤自洛川延紫至鄜州

城西五里張村占地約近百里劉厚基於鄜州甘泉力扼其北竄延綏之路臣劉典與高連陞率所部進耀州前隊已抵同官高連陞及提督銜總兵劉端冕率輕騎追之此十月初五日以前賊被逼窘蹙竄入北山之寔在情形也臣等竊維捻逆所恃者萬馬縱橫利於平地茲經官軍進逼鋌走北山已失其飄忽慣技惟秦省兵燹之後蓋藏久已罄竭無糧可裹北山荒瘠殊甚又不能就地徵糧各軍入山追逐必先於山外採儲以供携取現已飭廣爲購運并加給各統領行賞使其沿途自

行覓賈以利進行察看賊蹤趨向不外北竄西竄兩途
西竄則必於三水邠涇一帶折而南奔其患在蜀在鄂
臣劉典及高連陞黃鼎等軍截之北竄則必由郿延綏
榆一帶折而東趨其患在晉記名提督劉厚基截之廣
東提督劉松山壽春鎮總兵李祥和總兵郭寶昌追之
如賊敢窺渡黃河劉松山郭寶昌卽渡河入晉助晉軍
截劉厚基仍留河之西岸以固秦疆務將此起巨寇
悉數殲除免釀異禍臣等惟有殫誠盡力慎以圖之斷
不敢稍涉迂回致誤大局已將調度情形咨行山西撫

臣及山西臬司陳澍協辦大學士四川督臣駱秉章四
川防軍提督周達武矣所有擒逆竄入北山現在籌辦
情形謹據實馳陳伏乞

皇太后

皇上聖鑒訓示施行謹

奏同治六年十月十三日

軍機大臣 字寄同治六年十月十九日奉

上諭左宗棠奏擒逆竄入北山現籌辦情形一摺擒
逆經官軍大舉進逼遁入北山勢必由郾洛上竄延緩

該處荒瘠殊甚非賊所注意恐藉此東趨晉省山西西路沿河一帶在在與陝省毘連防務喫緊轉瞬河流冰凍尤爲可慮著趙長齡督飭在防將士扼要嚴守並著飭令陳湜相機兼顧沿河船隻悉心提歸東岸毋稍疏忽賊騎倘渡河而東則蔓延綏榆勢將靡所底止豈劉松山郭寶昌兩軍所能殄盡晉省爲畿輔屏翰左宗棠當如何力籌兼顧陝省兵力不爲不厚總當就地破除不可以驅賊出境卽爲了事倘任賊東渡闌入晉疆惟左宗棠是問劉厚基一軍兵力尙單截賊恐未盡得力

左宗棠庫克吉泰喬松年劉典當熟商機宜妥籌調度
滄商一帶亦宜嚴密布置以防捻逆回撲由此出關邠
涇一路並著分撥得力將士加意嚴防毋任賊由西南
竄出繞逸川鄂蜀省北路及楚北襄鄭一帶著路秉章
李瀚章等各添兵勇分路扼守以固邊境將此由六百
里諭知左宗棠路秉章庫克吉泰李翰章喬松年趙長
齡並傳諭劉典何璟知之欽此

奏擒逆分股狂奔截剿疊勝摺

奏爲擒逆竄入北山後分股狂奔官軍分路截剿疊獲勝仗現籌剿辦情形恭摺馳陳仰祈

聖鑒事竊擒逆經大舉逼剿竄入北山兩獲小勝本月初五日以前情形業經臣等馳報是日已刻賊復由郿州境之隆坊吉子險一帶折向洛川東北竄擾記名提督劉厚基尋蹤掩擊行至距洛川十里安公村遇賊尾隊出其不意擊之斃髮賊數十名生擒滿髮賊八名訊稱前隊分起在前攻寨掠食劉厚基卽令其引路行至

永鄉鍾霍家村見賊果分撲兩寨卽麾軍擊之陣斬賊五六百名前路地勢險狹官軍嚴陣追逼賊之墜崖死及經羣矛刺斃者不下二百餘名生擒賊目宋三元及連天福姚宗望等二十三名奪獲馬騾驢百餘匹大小旗幟八十四桿洋礮二十四桿餘賊奪路狂奔山谷皆滿訊據宋三元供山東濟甯人藍旗巨逆宋景詩之黨也今在張五黑黃旗內當頭目姚宗望係邱天將部下當頭目其洋礮則由回逆轉購而來逆眾因吉子險張村遍地荒草無從掠食故走此路覓糧訊畢斬之劉厚

基方調分駐中部三營至洛川會隊初六夜謀賊已分
兩股一由衙子河一由舊縣均於前途合竄鄜州劉厚
基卽夜馳向鄜州初七日抵鄜城始知初五日擊敗之
賊是其分股其另股已於初五日竄到鄜州城外五里
監軍台比經劉厚基所部副中營四川補用副將劉厚
填出隊迎擊劈山抬鎗輪番斃賊頗多鎗礮止刀矛接
殺斃悍賊十餘名奪獲大旗七桿戰馬九匹而賊來益
眾官軍弁勇陣亡十餘名因而挫退入營愆逆隨圍劉
厚填營盤并分撲州城東南二門經鄜州知州田景瀛

儘先參將署都司張鵬程吏目孟振鈞督民團嬰城固守賊連撲十數次均經擊退悍賊旋衝入外城復經田景瀛督民團殺退相持一日一夜官軍力竭不支正危急關適劉厚基所部駐甘泉縣之左營赴廊救援聞城中砲聲不絕比卽督隊由北門衝入一面助守州城一面出隊掩擊賊始解圍敗竄復分三股一由任家台走府村一由道左舖走甘泉一由牛武鎮走出家灣劉厚基正派隊追剿聞忽有西路狗土各逆數千乘機從羊圈大宜村撲廊州城垣劉厚基仍留劉厚填副中營及

由甘泉來援之左營都司曾祥萬副將劉文華率所部
助鄜州防勦劉厚基卽於初八日進援甘泉縣行至道
左舖見騎賊數百排陣以待劉厚基飭各營留五成隊
修築營壘五成隊出擊連放開花礮劈山礮斃賊數十
奪獲大旗五桿賊且戰且奔劉厚基躡追至甄家灣破
賊館數處正追勦聞忽西路隔河馬步賊千餘蜂擁來
援副將李作福首先衝擊連斃賊三名李作福旋被賊
圍困身受數傷墜馬勇丁已傷亡數名劉厚基見官軍
勢已難支卽帶馬隊衝入救出李作福鎗礮連轟將賊

擊退賊旋向甘泉竄出是夜五更劉厚基親率馬隊由
開道馳赴甘泉初九日巳刻行抵甘泉城外正值逆賊
大股逼撲縣城復見劉厚基旗幟解圍遁走甘泉縣知
縣魯學浩率團眾開礮轟擊賊復由甘泉縣城東八里
之蟬溝入山竄東鄉清泉鎮劉厚基收隊入縣城小憩
藉息兵力探報牛武鎮之賊已由麻子街竄走任家台
之賊亦由府村竄走其地皆屬甘泉東鄉北可通延安
府城南可通宜川縣城劉厚基擬隨賊所向擊之十二
日由牛武鎮一帶追剿十四日卯刻抵宜川縣城而賊

之前隊已於初十日竄至甘泉縣東之臨鎮宜川縣北之雲巖鎮並分股擾及宜川縣東北之蘭家哨劉厚基慮賊窺渡黃河或南竄韓城十五日移紮宜川城東五十里甘草坪扼之臣宗棠前以韓城神道嶺及澄城北路空虛慮賊折而南趨已飭總兵李南華率所部分扼神道嶺及各峪口而咨廣東提督劉松山壽春鎮總兵李祥和總兵郭寶昌各率所部全軍於十三日由白水洛川進宜川延川延長追剿恰與竄宜川之賊相值尙未接其到宜川續報此捻逆北竄鄜州甘泉均經官軍

擊退解圍疊獲勝仗旋折由東南趨宜川縣境之實在
情形也其西南另股捻逆勾結回逆之犯耀州者十三
日回逆突至耀州城西三十餘里官莊十四日辰刻記
名提督劉効忠潛師襲之賊知官軍有備遽向東北奪
路入山而竄劉効忠收隊旋聞此股已竄州城北三十
餘里黃鋪一帶劫去軍糧二千七百斤是夜五鼓劉効
忠仍率八成隊伍馳往擊之迨至黃埔則賊又竄近同
官縣城東南十餘里之宜興高村劉効忠督隊襲之斃
賊約數百名奪獲騾驢數十其犯同官者十四日辰刻

擒回數千合股紛竄縣城數里時高連陞總兵劉端冕
已輕騎追賊至洛川各營半留宜君半留同官待調臣
劉典已抵宜君縣屬苦泉所部除已撥三營赴防三水
外餘僅留三成隊伍在耀州駐防同官副將范克復等
商之署同官縣知縣王浩令左右兩哨會同臣劉典等
所留隊伍迎勦范克復所部副將周萬祥自金鎖關聞
警回援由南門出劉端冕所部副將譚同聲會督各營
隊伍前往助剿鎗礮連環轟擊斃賊數十忽騎賊數千
由西原鳧水衝至范克復率左右兩哨及親兵兩哨馳

往接應步賊從左右兩山包抄而下周萬祥令左哨百
長花翎守備謝元信從西原上令右哨百長花翎游擊
曹啟瑞從中路衝擊賊勢兇猛曹啟瑞被圍周萬祥往
援相繼陣亡弁勇同時陣亡者二十九名受重傷二十
四名譚同聲突前手斬紅旗捻目一名忽飛子中腦當
卽暈絕游擊黃緒鴻接戰整隊相持至晚始克收隊知
縣王浩以捻回合勢賊數眾多飛稟臣劉典迅速回援
臣劉典并飛致高連陞劉端冕馳回速剿十五日辰刻
親率隨身弁勇四百餘名折回金鎖關一面築壘一面

派都司銜守備劉上吉馳諭同官各營留存隊伍固守待援而文生喻鴻吉亦先日商之參將周萬國等將各營併作兩營以便固守是日申刻高連陞所部正四營由宜川回抵金鎖關未暇傳餐卽空腹赴同援勦臣劉典以援兵已集城壘無虞劉効忠又自南來賊必敗竄敗竄必由焦家坪苦無多兵可撥勉派親兵數十卽夜赴焦家坪設伏待之十六日寅刻高連陞續派所部副四營及內外八哨親兵續回金鎖關臣劉典卽商派貴州候補同知洪惟善同副前副右兩營赴同官協勦派

副左副後營內外八哨及親兵隊徑赴焦家坪截擊黎明賊仍率隊攻城范克復竭力堵禦高連陞所部提督銜總兵丁賢發從西寨之南進副將陳得勝總兵高有志均從西寨之北進副將朱桂馥鄧玉魁及叅將李國良從西寨之東北進鎗礮齊轟刀矛並舉斃賊甚多賊拚死回撲十餘次騎賊繞抄繼以步卒勢極兇狠丁賢發怒馬斫陣斃黃旗滿髮賊首一名正割取首級左手爲賊洋鎗子所傷各勇乘勝齊進賊遂大敗紛紛向北竄走官軍緊追斃悍賊數百馬驟倒地者無數賊果由

焦家坪竄走臣劉典率親兵數十名由金鎖關踰高嶺而進甫登嶺顛卽見賊隊紛竄中隔一溝遂揚旗發號相併而行聞前途礮聲不絕知己得手適臣劉典所部總兵黃有功率大有率隊由中部續到卽飭其緣嶺而進以壯聲威焦家坪各軍正鏖戰聞高連陞劉端冕由洛川一日夜馳二百六十里趕至換馬飛赴前途督戰益急至二更始收隊回營兩戰共計殺斃羸斃擒回各逆實近二千名帶傷而逃者不計其數敗賊旋由西北竄走未獲盡殲而兇鋒實已大挫此十五六兩日西路

官軍截勦捻回大獲勝仗之實在情形也臣等竊維捻逆之竄入北山非其本意各路軍營擒獲生賊訊供賊黨無不怨張總愚失計者故已北竄至甘泉而復折由東南以走宜川北境俟西竄股逆勾結回匪合併將南趨韓城出山否則俟冰橋結成可以過河犯晉現在劉厚基已到宜川結營縣東五十里甘草坪正扼其南竄韓城之路又距黃河岸僅四十里亦可扼其偷渡之路韓城神道嶺既派軍扼紮而劉松山郭寶昌全軍復由洛川以向宜川是南竄一著渡河一著似可無虞若由

延川延長北竄則劉松山等軍躡蹤追勦亦難善脫惟由洛川宜君中部一帶南竄出山或徑西竄以趨邠鳳不可不防臣等當慎以圖之務將此股悍賊盡之秦中稍紓

慮念現據各路探報猖匪土匪甘肅飢潰之軍及各處游勇已多附入其中賊數雖有增加若能聚而殲之又未嘗非秦事一大轉機也此次截勦捻回各匪實在出力各弁勇已飭存記彙保其血戰陣亡之副將周萬祥楊瑞庭游擊曹啟瑞劉貴和盧得生游擊銜都司蔣福

榮都司周明勝周友勝龍昌騎守備董占魁劉仕炳吳榮任何光照吳金標並鎗子傷腦回營殞命之副將譚同聲應請

飭部從優議給

卹典以慰忠魂所有截剿疊勝情形謹據實馳奏伏乞

皇太后

皇上聖鑒訓示施行謹

奏 同治六年十月二十四日

奏各軍剿回獲勝甯州解圍正甯等縣甫失旋復
摺

奏爲官軍進剿回逆甘肅甯州解圍邠涇防軍剿回獲
勝及甘肅正甯陝西寶雞兩縣被回逆闌入旋皆收復
各情形恭摺馳

奏仰祈

聖鑒事竊臣宗棠准陝西提臣雷正綰咨呈八月二十
四日據報回逆於二十二日突至甘肅甯州西南關外
攻撲甚急當選帶奮勇之士一千人星馳赴援行抵清

華堡回逆飛騎迎敵我軍結陣而進鏖戰四時賊眾我
寡互有傷亡日暮收隊駐紮早勝地方次日派都司李
廣珠率二百人由東原越澗潛伏東城左側伺間入城
爲內外夾擊之計自率隊由南原下南川誘回逆至清
華堡時已初更城中礮聲震山谷該逆飛奔回顧我軍
乘勢躡追直抵城邊李廣珠自城中出該逆腹背受敵
夜閒不辨官兵多寡遂各狂竄我軍乘勢追擊先後斃
賊二百餘名奪獲騾馬數十匹遂解甯州之圍其駐紮
甘肅涇州之記名提督張在山一軍因逆回馮均福禹

得彥等移巢鎮原縣屬之蕭金鎮蒲河川窺伺涇州南
北兩原八月初三二十九月初十二十七十九等日
屢派所部游擊馮秀章副將項上達趙占魁劉明泰鐘
本起喻佑勝等於羅漢洞毛家堡周家坪紫金坡小流
陳家堡等處率隊剿擊屢有斬馘生擒李英兒蘇二蘇
五等六名奪騾馬三四十匹該逆未受大創仍敢由蒲
河川至荔家堡涇河川一帶圍攻村堡二十九日張在
山力卽督隊會合雷正綰派赴涇州助剿之游擊趙金
彪馬隊馳赴涇河川是夜四鼓上原十一月初一日黎

明抵荔家堡一鼓直前陣斬回逆數十名餘賊向蒲河
川奔逸初三日張在山勒兵進剿蒲河川馬隊先薄賊
壘該逆據險抗拒不利騎戰趙金彪與張在山所部游
擊王朝料下馬持矛大呼陷陣刺死悍賊數名張在山
疾馳下坂併力攻擊斃賊二三百名奪獲騾馬牲畜三
百餘頭毀其巢餘逆向蒲金鎮竄逸此涇州防軍勦回
獲勝情形也初四日甯州龍灣里回逆擾及甘肅正甯
縣之山河鎮初六夜突入縣城旋據署陝西三水縣知
縣况瀚稟報正甯縣知縣黃紹薪隨同雷正綰所派援

兵於初九日收復正甯縣城尙未接雷正綰咨報而此股回逆寔據三水之陽坡頭職田鎮先是臣宗棠因正甯失守檄駐紮陝西邠州之已革提督譚玉龍一軍兼顧三水十一日譚玉龍率所部馳職田鎮先選精銳百餘名由閒道入城協守卽分三路進剿回逆逞兇搏戰譚玉龍令軍士佯退俟其逼近以劈山礮排擊之斃賊無數逆騎返奔自相蹴踏我軍乘勝掩殺追至聖來溝又斃賊數百名奪獲騾馬二百餘匹長矛二百餘桿生擒逆回十一名訊供阿渾馮均幅率黨入陝來助髮捻

等語卽陣前斬之十二三兩日復分道追剿截殺多名十五日收隊回邠此邠州防軍赴三水剿回獲勝情形也另股回逆由甘肅竄入陝西隴汧境地於十一日突陷寶雞縣城經臣宗棠檄提督銜記名總兵楊和貴後路五營總兵周金品馬隊由咸陽西上會同剿辦並飭道員黃鼎赴邠之軍改赴鳳翔以壯西路聲援該逆旋於十六日遁去臣等竊惟秦隴辦賊之局先擒後回近因捻入北山回逆意我腹地兵單輒敢乘虛內犯自應分兵西路兼遏回氛臣宗棠仍檄楊和貴等西向寶雞

以資防剿並于三水一帶酌撥數營西與邠涇防軍聯絡東與同官宜君勦擒之軍聯絡以固秦圍並催雷正綰張在山合兵進搗回巢除俟查悉正甯寶雞兩縣文武下落另再陳

奏外謹錄臣宗棠臣劉典諭回告示兩道恭呈

御覽所有甯州解圍及各軍勦回獲勝正甯寶雞兩縣失守收復各情形謹合詞恭摺馳

奏伏乞

皇太后

皇上聖鑒訓示施行謹

奏 同治六年十月二十四日

軍機大臣 字寄同治六年十月三十日

上諭左宗棠等奏捻逆竄入北山分股狂奔官軍截剿
疊勝並各軍剿回獲勝甯州解圍正甯等縣甫失旋復
情形各一摺覽奏均悉捻逆由邠州境折向洛川經提
督劉厚基連番追剿突圍劉厚填營盤劉厚基卽出隊
擊追遂分竄甘泉擾及宜川縣雲巖鎮等處其西路捻
股勾結回逆攻犯耀州州城及竄近同官縣各地方亦

經提督劉劬忠等分馳掩擊斃賊甚多現在劉厚基等由宜川洛川等處分路前進正可乘此聲威痛殲醜類。昔左宗棠庫克吉泰喬松年劉典嚴檄劉松山等各率所部分投勦截使該逆不得喘息就地殄除惟捻蹤飄瞥靡常鄜延所屬各邑在在與晉省毗連轉瞬冰橋凝結難保其不合併東趨過河犯晉左宗棠等仍當懷遵疊次諭旨督飭各營將士實力堵扼毋任闖入晉疆更形延蔓陣亡之副將周萬祥楊瑞庭游擊曹啟瑞劉貴和盧得生游擊銜都司蔣福榮都司周明勝周友勝龍

昌騏守備董占魁劉仕炳吳榮任何光照吳金標並受
傷殞命之副將譚同聲均著交部從優議卹以慰忠魂
甘肅回逆攻撲甯州州城都司李廣珠出奇擊賊追斃
多名甯州得以解圍涇州一帶踴回復經張在山分勦
獲勝正甯寶雞兩城失陷譚玉龍楊和貴等先後分道
援剿旋經收復此次回匪疊爲官軍摧挫其銳漸衰著
左宗棠等飭知雷正綰張在山等分督各軍相機進剿
以期早靖逆氛陝甘回患已深自應隨時變通辦理左
宗棠等呈遞曉諭回民分別勦撫告示兩件尙合機宜

著卽廣行張示以消反側將此由六百里諭知左宗棠
庫克吉泰喬松年並傳諭劉典知之欽此

奏和厚兩營失利及遏擒東竄摺

奏爲官軍由洛川進剿擒逆途遇回逆和厚兩營失利各軍回援擊敗回逆並力遏擒逆東竄情形據實馳

奏仰祈

聖覽事竊官軍截剿擒回疊獲小勝兩獲大勝十月十六日以前情形業經恭摺馳報此尙未得廣東提督劉松山等追賊消息二十八日准劉松山及總兵郭寶昌報稱自十七日駐中部之合插子地方探聞擒逆已竄宜川亟思催隊緊追奈此一帶均係峻嶺深坑馱載軍

裝動輒傾跌塞路數日內倒斃騾馬幾百匹步隊亦僅能魚貫而行不能成列前隊一經出險卽須急行讓空道路以待後隊踵至首尾每難相顧十九日因見洛河水急路狹竄渡需時劉松山率前隊十二營先後渡河進發留三營在後繼進郭寶昌一軍亦銜尾前行其最後者爲安徽壽春鎮李祥和所部和厚兩營劉松山將抵洛川縣城接後隊提督黃萬友飛報後路礮聲不絕恐有戰事當將留後三營折回郭寶昌已督率馳回策應行至山頂據報回逆數百騎突竄太賢村適李祥和

及提督劉芳桂隊伍小憩村旁瞥見賊騎馳至李祥和
卽率親軍衝擊倉卒之際官軍與賊不分李祥和左右
衝突各親軍亦人自爲戰少頃賊騎復增李祥和戰馬
均中礮子遂下馬持矛連刺數賊右臂受鎗子傷仍裹
創血戰各弁勇奮力衝殺斃賊頗多劉芳桂率親兵數
十人斫圍直入賊亦舍騎持戰李祥和身被十創復被
賊矛中喉遂歿於陣劉芳桂面被賊刃斫傷身受矛傷
多處正危急間郭寶昌馳至揮軍奮擊斃賊數十名賊
稍卻黃萬友亦至帶同厚字營與郭寶昌分路並擊賊

敗退向東北龍安鎮竄走時已日暮未便窮追遂將和厚兩營輜重及陣亡將士屍骸收至洛河東岸是役其陣亡弁勇八十八人受傷三十八人劉松山是夕回軍與郭寶昌合隊二十日五鼓出隊尋蹤追剿行八里據探報賊已遠遁遂收隊二十一日仍赴洛川劉松山留劉芳桂在洛川調治以黃萬友權領和厚兩營事據中部縣知縣黃召堂稟報此股回逆即十六日官軍在同官焦家坪剿敗之賊經郭寶昌黃萬友擊退後已向鄜州張村驛一帶竄去其大股捻逆據提督劉厚基署甘

泉縣知縣魯學浩報稱十六七等日該逆分擾宜川之
雲岩九卽廟北地新集延長之交口岔口等處臣已飛
催劉松山郭寶昌兩軍仍遵前議由宜川延長延川一
帶沿河抄截劉厚基分途追擊並檄甘肅提督高連陞
由鄜州甘泉延安綏德一路邀截扼其北竄務將此股
擒逆就秦地殲除不敢稍涉大意仍商請三品鄉銜幫
辦陝甘軍務臣劉典扼洛川宜君同官一帶杜擒逆西
南出山及回逆東竄合擒之路臣於二十四日欽奉十
月十九日

寄諭左宗棠奏擒逆竄入北山現籌剿辦情形一摺晉
省爲畿輔屏翰左宗棠當如何力籌兼顧陝西兵力不
爲不厚總當就地殲除不可以驅賊出境卽爲了事儻
任賊東渡闖入晉疆惟左宗棠是問等因欽此跪聆之
下惶悚無地伏念臣入秦之際卽深以擒逆他竄爲慮
故與劉典分道入秦杜其竄豫竄楚之路臣入潼關後
凡所布置均爲就地殲賊起見不但晉省爲

畿輔屏翰不敢容賊東犯卽豫楚蜀等省亦不肯任其
奔逸故與各將領咨諏方畧大舉圍逼期殲賊於渭洛

之閒捻逆知無竄路鋌走入山北山荒瘠殊常官軍追
勦皆以無糧不能急進臣不惜重貲分道設局轉運而
其中實有人力難施之處加以回逆內犯牽制我軍劉
典高連陞劉松山郭寶昌劉厚基各軍先後皆被牽掣
頓滯師行夙夜惴惴深以捻逆直趨北路爲懼今幸賊
未遠竄劉松山等均尙能及賊抄擊事機尙有可乘至
於山西防務臣在潼關時卽與山西按察使司陳湜熟
計尙交冬令宜注重河曲保德一帶以備永橋今陳湜
請催晉兵二千名赴河保由山西大同鎮馬陞督防又

分所部忠字等四營刻期疾趨北路與馬陞協防陳湜
所部四營約可於十一月初十日以前到防其所調晉
兵不知能否無誤臣奉

命節制山西河防敢不兼顧惟自山西至河保已千數
百里不但臣鞭長莫及卽陳湜亦慮呼應不靈臣豈敢
遽謂確有把握故時存萬一之慮與劉松山郭寶昌先
申東渡之約臣生平以驅賊爲恥况晉防關係匪輕豈
竟不知緩急臣之私願固期殲賊秦中而不能不防其
竄晉及豫楚對三省者則力小任重不免時存過慮也

十九日之役李祥和猝遇回逆力戰陣亡深堪悼惜該
總兵爲羅澤南舊部轉戰數省屢立奇功入秦後戰績
尤爲卓著可否請

旨將記名提督

賞穿黃馬褂雲騎尉世職安徽壽春鎮總兵李祥和
飭部照提督陣亡例議卹並懇

恩予謚附祀羅澤南湖南專祠以慰忠魂出自
天恩所有官軍追擒和厚兩遇回失利各軍擊退回逆
并力遏擒逆東竄情形謹據實馳陳伏乞

皇太后

皇上聖覽訓示施行謹

奏

同治六年十一月初一日

奏騎賊闖入安塞片

再據延安府膚施縣知縣何啟錕稟報十月初七日甘泉縣屬之勞山突來馬步賊匪數千人初八日有賊騎至郡南二十里舖初九日至距城七八里地方窺伺經延安營叅將李玉珍及保安糧台委員侍衛卓凌阿等率親兵出城迎探賊即退去十一月勞山賊悉竄郡屬

之南泥灣又據署安塞縣知縣王魯庭稟報十二日騎賊由膚施之劉家莊至該縣南門磔子溝步賊緣山薄城縣城跨山一面本無高垣賊眾搭梯攻城不能抵禦縣城被陷各等語伏查十三日至十七日捻逆大股皆在宜川延長之間此股由膚施縣境闖入安塞之賊或係髮捻另股由甘泉東趨將赴宜延合併者現在延安有無賊蹤及安塞是否尙爲賊踞未得續報現已檄高連陞馳赴延綏一帶相機截剿一俟得有續報再行馳奏謹附片具陳伏乞

聖鑒訓示謹

奏 同治六年十一月初一日

軍機大臣 字寄同治六年十一月初七日奉

上諭左宗棠奏和厚兩營遇回失利並邊捻東竄情形暨騎賊闖入安塞縣城各摺片李祥和所部和厚兩營由洛川追剿捻逆行至太賢村地方猝遇回逆衝突李祥和力戰陣亡本口已明降諭旨將該總兵交部議卹並准其予謚附祀矣此次官軍進剿因山路險峻以致遇回失利傷損將弁多人雖經劉松山等尋蹤追擊而

該逆業已遠颺其大股捻逆仍分擾宜川延長等處是
回捻互相擾亂竄北竄東均未可定著左宗棠庫克吉
泰喬松年檄催劉松山等軍分途抄截使回捻不得相
結就地殲除劉典亦當督飭將士嚴扼洛川宜君一帶
以遏逆蹤紛竄晉省河防曾經諭令趙長齡飭令陳湜
妥爲防範此時宜川延長一帶賊蹤麇集逼近河壩尤
不可不加意嚴防著趙長齡傳知該臬司嚴督所部晝
夜梭巡探明何路警急迅卽相機堵剿如因防守不密
致逆匪竄擾晉疆惟趙長齡陳湜是問左宗棠仍當隨

時兼顧力保完善不得以驅賊出陝爲了事前據裕瑞等有回匪欲於封河時由草地竄包頭歸化城之奏已令裕瑞等撥兵分防惟歸綏一帶兵力尙單著趙長齡迅催前調之太原大同兩鎮兵二千名趕緊前赴裕瑞軍營以資厚集裕瑞桂成務當於包頭等鎮要隘處所力籌堵禦毋任回眾乘閒內犯以致防勦益難勞山賊匪由膚施縣境闖入安塞縣城左宗棠已檄高連陞馳赴延綏一帶截剿著飭令該提督趕緊進攻毋令久踞該處失陷情形並著左宗棠查明具奏將此由六百里

諭知左宗棠庫克吉泰裕瑞喬松年趙長齡桂成並傳
諭劉典陳湜知之欽此

覆陳甘肅餉事通籌陝甘全局摺

奏爲遵

旨覆陳甘肅餉事通籌陝甘全局從長計議據寔馳

奏仰祈

聖覽事竊臣欽奉同治六年五月二十三日

寄諭穆圖善奏甘省軍餉奇絀請將各省協餉變通辦理一摺所有本年三月以前及續解餉銀仍由湖北徑解漢中交陳丕業經收轉解林壽圖不得擅行截留致誤大局惟前據左宗棠奏稱借用洋商銀一百二十萬

兩自本年七月起分六箇月於各關稅項下撥還由各
省將應解甘餉撥交各關是本年七月以後各省協甘
之餉已歸左宗棠收欸此後甘省軍餉左宗棠卽當遵
照前旨酌定數目按月撥給以資接濟等因欽此又奉

九月初七日

寄諭西安糧台應否裁撤並著左宗棠等酌度奏聞辦
理等因欽此又奉十月初七日

寄諭穆圖善奏請飭催各省協甘餉銀並籌撥雷正綰
軍餉各等語著左宗棠李瀚章曾國荃喬松年分飭陝

西藩司及湖北後路糧台遇有協甘餉銀隨到隨解不
准停積截留致誤軍食等因欽此仰見我

皇上軫念西陲於嚴催餉運之中仍寓通盤籌畫之意
臣伏查甘肅地方荒瘠承平之日專恃各省協撥軍興
以來餉絀兵增遂致困敝不可收拾陝甘歸督臣統轄

甘有事則陝受其害陝無事則甘蒙其利安陝乃能固
甘此如一家一人之事不可區而爲二也前督臣楊岳

斌設甘肅後路糧台於西安以陝西布政使林壽圖領
其事支應平固慶涇各軍初制甚善迨甘事日棘楊岳

斌不及通籌餉事林壽圖身任陝藩兼辦甘肅糧台平
固慶涇各軍如有飢譁陝西先受其害自應酌量截留
甘餉接濟其截留也仍以餉甘軍非以餉陝軍也楊岳
斌後令道員陳丕業於漢中改設糧台轉餉逕解泰安
不由西安經過亦明知林壽圖勢處萬難而急於自救
目前不遑兼顧本非其心之所安畢竟自漢中秦安逕
解甘省餉道時形梗阻楊岳斌亦未盡得改道之利也

上年九月

臣承

恩命調任陝甘籌西征的餉兼催各省協餉各省以甘

餉爲臣軍所需故急於措解去冬甘餉之旺爲比歲所無臣方由閩起程凡餉銀軍裝多由閩浙湖南運至湖北乃設陝甘後路糧台於鄂揚岳斌恐臣截留甘餉情見乎詞臣念甘肅需餉之殷冀楊岳斌得餉後整飭各軍維持甘局臣度隴時亦可資其兵力比臣又但擬前帶五六千人自鄂而秦徐圖入隴計新增閩粵浙三省協餉尙可支持故有不截甘餉之議嗣因捻逆張總愚入秦後兇醜更張任柱賴汝洸又盤旋鄂境不能不添募勇丁爲剿捻之計遂至增兵數倍加以購買驟馬車

馱料量行費需用更爲繁鉅臣軍月餉僅福建四萬兩
浙江二萬兩不敷甚鉅入秦之際已不能不挹注甘餉
入秦後芻糧騰貴臣運奇艱費益不貲而陝甘各軍之
極困者既不能不略予通融客軍之出力者尤不能不
時其緩急臣舍甘餉無可動之款而甘軍數經敗潰其
勇數已大減於楊岳斌在甘時以所得協餉計之亦尙
不至窘於往歲若以甘餉全畀甘軍能辦賊與否
臣既不敢知而臣軍且立困於中道此臣動用甘餉緣
由不得不直陳於

君父之前者也。臣所籌借洋商銀兩除水脚保險滙費
息銀外實可得一百一十餘萬兩。此事先爲上海稅務
司所梗。幸道員胡光墉設法辦成。已不免稍稍時日而
山西解州票商因晉省河防戒嚴不敢諾承滙解洋欸
多由各省實解鄂台舟至湖北安陸府屬。又值鍾祥獅
子口堤決不能迅速輓運。頭批解到已在九月下旬。臣
軍待餉正亟應手而盡。二批到時除分潤各營外籌湊
銀六萬兩撥解甘省而臣軍各營餉項現已積欠三四
月不等。此後洋商借款陸續運到卽須陸續撥用計本

年十一十二兩月支發軍餉糧價卽行竭蹶各省明春
協餉就令正月卽解已須三月抵秦已恐停兵待餉况
陝西軍務方殷主客各軍糧價及涇慶各軍又不能不
隨時勻濟此洋商借款未能按月多濟甘軍之實在情
形也查甘軍餉項除六月間據陳丕業稟報續由漢中
收解銀十五萬五千餘兩外經臣催撥四川協餉銀共
四萬兩近又撥浙江協餉銀十萬兩籌解署督臣穆圖
善本年秋季江甯月餉銀六萬兩又催提山西河東協
餉由林壽圖先後撥解銀六萬兩撥給甘軍總兵胡世

英所部餉銀一萬兩並飭四川援甘局將翎捐一項催繳解甘約尙可得十餘萬兩計自六月間臣入秦後其撥銀三十七八萬兩併陳丕業林壽圖前後所解總計約六十餘萬兩甘省前數年所得協餉尙未必如此之多從前數年奏咨案牘可查也然臣猶思竭籌畫以濟甘軍一俟三批洋欸到日卽再撥銀五萬飭林壽圖委員迅解秦安轉解蘭州以應甘省年終之用一面飛咨四川督臣於前此臣商懇川省代辦軍米內先儘署督臣酌提濟用將來米捐如能起色亦就近於四川捐局

隨時酌撥濟甘雖事有先後緩急亦斷不敢膜視甘軍
重煩

宸念惟畧督臣穆圖善現飭林壽圖撤西安糧台悉以
餉事歸秦安糧台又分撥山西河東協餉歸雷正綰委
員守催而令曹克忠舊部張在山涇州一軍仰給於雷
正綰涇軍先存疑慮在署督臣恐林壽圖截留餉銀因
併西安糧台撤去正與楊岳斌漢中轉餉事出一轍而
以涇軍餉事寄之雷正綰坐使涇軍解體實覺非宜若
令慶涇各軍概取給於秦安糧台又鞭長莫及慶涇防

軍皆將渙散陝省卽有剝膚之災自古用兵西北必多
籌運道以備不虞似此專注漢中秦安一路設有梗阻
必致貽誤且自西安至甘十六站自漢中至甘二十七
站遠近攸殊於漢中設分局轉運四川銀米可也若轉
運各省甘餉於道里軍情兩無所取此後臣軍入甘亦
必仍於西安設陝甘總糧台則現設西安之甘肅後路
糧台豈有撤理林壽圖雖再四懇請裁撤臣未允行良
以事勢了然無煩再計此西安糧台未便裁撤之實在
情形也竊謂寇來自外急藩籬而緩堂奧用兵於內後

枝幹而先本根督臣總制陝甘當籌兩省全局甘省此時之患在兵多而不能戰或被奸回軟困或與土匪勾連現在存營名冊未可覆按而陝省西北各路已大受甘軍之累卽如胡世英一軍十營經署督臣檄來延安其逃勇從賊抗拒官兵曾爲提督劉厚基所擒斬胡世英來陝日久坐視回土各逆剽掠曾無一矢相加欲撤之使去則欠餉已巨欲督之使戰則挫勇無疑卽此類推甘軍大略可想陝省檢回交訖又益以甘軍潰勇串合蔓延勢方岌岌陝境不靖甘餉從何轉運軍事旣先

陝後甘餉事亦不得不移緩就急臣今日在陝固不能

視甘肅爲退方異日入甘亦仍必以陝西爲根本可否

敕下署督臣穆圖善將甘軍屢經譁潰有名無實各營

核實察驗綜計每月撙節支用約實需餉糧若干咨臣

商辦然後議立兩省分總糧台酌量緩急分別撥濟乃

爲正辦至於議撫議斷必俟陝境捻平之後臣軍向甘

始可辦理蓋現在議勦固無兵力議撫頗受回欺是甘

餉僅可暫爲點綴不能以全力注之臣將來以全力

注甘亦必先籌轉運先籌屯墾而後可以下手亦斷不

能苟且目前爲一時權宜之計致蹈故轍愚拙之見甘肅改設之台祇宜責令就近轉輸川湖餉米陝省現設之甘肅後路糧台仍留以司協餉之總滙不可因遷就日前自誤大局是否有當謹據實覆陳伏乞

皇太后

皇上聖鑒訓示施行謹

奏 同治六年十一月初四日

奏陝甘撫局勢難敷衍片

再甘肅近日情形臣處毫無聞見地方文武官軍紳及

帶兵將領臣無素識之人一切無從訪察正拜摺册喬
松年接到西甯鎮總兵黃武賢所寄一緘似撫局已有
不能敷衍之勢臣既有所見不敢壅於

上聞謹照錄原緘一併恭呈

御覽

謹錄甘肅西甯鎮總兵黃武賢致陝西撫臣喬松年原
緘恭呈

御覽

啟者弟自去歲七月內在甘屬隴城大營荷蒙

奏留軍營効用九月內隨同晉省先後各情形佈泐數
函未識得邀青覽否茲於本年正月內弟奉文飭赴新
任以專責成等因遵卽束裝起程三月初三日接印任
事無如地方擾害年久萬民塗炭至甚營伍絕餉多年
有兵卽似無兵弟自去年至今到任以來地方苦不可
言刻下衣食難堪世閒未有見過餓死總兵也所有在
城文武官員被匪挾制多年任其使喚非

朝廷之官也至城鄉內外漢莊任從匪類日夜搶奪茲
淫如似已物民不敢阻官不敢辦任從匪意慘不勝言

弟亦不得已暫且然之如似籠中雞鳥無異至貴德廳承丞全家二月十六日被害到今不能完結官亦不敢理問後因該處番子不服代其報警將城外回莊一律燒盡該匪入城盤踞相持月餘至五月內馬朶三由山後巴燕戎帶人來甯並調甯地狗眾前往貴德救援番子聞風而逃將百餘漢莊及城內外文武衙門廟宇燒成焦土北川新城四月十七日已經失守並將威望堡百餘漢莊燒如灰塵如此情形披猖不知後來如何了結刻下穆將軍署理督印楊宮保卸任止准投誠不准

勦辦自數年以來漢民不准入城若再一年西甯漢人絕矣弟現在坐井觀天舍姪被殺無法可施祇有除死方休而已素叨雅愛肅滅奉聞再本年三月內前宮保楊派令梅開泰軍門鄧護提軍全忠統領十餘營進勦西碾先住碾伯縣將馬莊米拉三溝賊巢一律勦滅淨盡直抵巴燕戎其功不小辦理甚是得手不料於六月二十三日因何事故全軍潰回碾伯縣軍裝器械俱失兵勇現住碾伯縣滋擾萬民塗炭鄧提軍雖漸次收錄數營亦無益於事其兩軍門諒必各有心病致悞大局

未知將來如何結局

軍機大臣 字寄同治六年十一月十一日奉

上諭左宗棠奏覆陳甘肅餉事通籌陝甘全局俟軍行人甘卽當接篆任事並西甯撫局難恃各摺片據稱穆圖善現飭林壽圖撤西安糧台悉以餉事歸秦安糧台又撥分撥山西河東協餉歸雷正綰委員守催而以涇軍餉事寄之雷正綰恐涇軍先存疑慮若令慶涇各軍概取給於秦安糧台又鞭長莫及且用兵西北必多籌運道以備不虞似此專注漢中秦安一路設有梗阻必

致貽誤等語所籌深中款要現設西安之甘肅後路糧
台卽著左宗棠飭令林壽圖妥爲辦理毋庸遽議裁撤
其甘肅改設之台卽責令就近轉輸川湖餉米以資撥
運穆圖善務將甘軍覈實察驗撙節支用綜計每月約
實需餉糧若干咨明左宗棠商辦左宗棠亦當彼此兼
顧源源接濟俾免譁潰之虞甘軍雖有一百四十營之
多據左宗棠奏稱楊岳斌去甘之先多已逃潰現在存
勇斷不及半著穆圖善切實查覈毋任各營官按籍索
餉致涉虛冒各營兵丁缺額暫時無庸招募以節餉需

左宗棠速將捻逆剿除並陝甘交界之回節節掃蕩馳赴甘境將該省兵餉剿撫各事宜實心籌辦以副委任並著穆圖善俟左宗棠入甘後即將總督關防派員齎送該督軍營八月十六日河狄回逆叛圍蘭省情形著穆圖善具實查奏仍隨時與左宗棠函商妥辦左宗棠奏喬松年接據總兵黃武賢函稱西甯危殆情形撫局已有能不一行之勢著穆圖善查明據實具奏仍一面咨照玉通會籌辦法以遏亂萌黃武賢原信著鈔給穆圖善閱看將此由五百里各諭令知之欽此

奏遵

旨覆陳摺

奏爲遵

旨覆陳仰祈

聖覽事竊

臣

正拜摺聞欽奉十月二十四日

寄諭穆圖善奏甘省協餉久缺瀝陳情形一摺甘肅現駐各軍應歸該省發餉者共有一百四十餘營之多所需糧石既難就地採辦應需餉銀本省亦無從籌欸省台及秦台所收川湖等省解到之欸杯水車薪計尙不敷一月支放之數現據該署督臚陳兵勇並應需糧數

日及缺餉危迫情形所奏自非虛飾甘省餉缺已久饑
軍譁潰堪虞若再不速撥接濟勢將不可收拾著左宗
棠按照穆圖善摺內所陳各情量籌接濟並著迅速撥
銀前往以維大局左宗棠身任甘督自應及早赴任未
便久住陝省著將陝省搶匪速行殄滅俟軍務辦有頭
緒卽行馳赴甘境穆圖善原摺著鈔給左宗棠閱看等
因欽此臣查署督臣穆圖善原摺所稱甘軍有一百四
十營之多均非不戰而食屯兵無賊之地等語各省協
甘的餉不及二十萬兩而甘軍除慶涇等軍由西安糧

台發餉外其在甘肅各台支餉者每月額餉尙需四十餘萬兩真不待知者而知其難楊岳斌入甘時銳進蘭州於後路未暇深慮迨身入重地顧此失彼後路時梗乃不得已而思增兵益餉勉強支持已爲失計聞其去甘之先所部各軍已多不戰而潰或相率潛逃存營人數實已減少穆圖善接署督篆後甘省各營勇丁又或潰散爲匪或私入秦楚軍中充勇計現在存勇斷不及半此匪臣一人逆億之詞也穆圖善旣一意主撫其分駐各處之營果有戰事與否臣不敢知但道路傳聞穆

圖善於八月十六日勒兵出郭受河狄逆回之降倉卒
被賺陣亡提鎮參游數人弁勇多名回逆遂圍甘肅省
城幸彭楚漢至始得解圍其餘近接陝界之回逆方各
出巢內犯陝境甘軍當少戰事臣自大關以來未接穆
圖善緘商兵餉進止機宜八月十四日曾致信穆圖善
婉陳一切竊謂甘回非盡不可撫必痛加懲創使逆回
有所畏設法安插使良回有所歸而後撫局可成甘軍
非盡不可戰必簡汰疲乏核併虛浮以所樽節之餉勻
加精銳有制之軍使一軍有一軍之餉一軍得一軍之

力而後戰事可恃若不早爲變計指望不可必得之協
餉遠贍飢軍聽各統領營官按月索取而又無以應之
其虛勇旣挂名餉籍概成積欠其實勇不敷日食未免
擾害民間營官不能行其軍令勇丁必致別滋事端將
如病者之遍體風痺不能運動何以爲剿更何以爲撫
臣身任陝甘總督不能早清陝境入甘任事夙夜疚心
此時穆圖善所辦之事卽臣異日接辦之事心有所知
豈敢以未嘗預聞置之不顧至甘軍待餉危迫臣籌撥
銀米已縷悉具陳臣俟剿捻事竣自當先剿陝甘交界

之回節節掃盪而西惟不敢冒昧從事急趨蘭州致蹈
楊岳斌故轍亦不敢久曠職守而以危苦之事累人擬
請

敕下署督臣穆圖善俟臣軍行入甘境即將陝甘總督

關防派員賚送臣營臣即當接篆任事穆圖善縱不相

催臣亦擬屆時請

旨區區愚忱斷不敢有所選擇有所趨避致負平生也
謹據實覆奏并鈔錄致穆圖善信稿恭呈

御覽伏乞

皇太后

皇上聖覽訓示施行謹

奏 同治六年十一月初四日

謹錄八月十四日致穆圖善信稿恭呈

御覽

甘省籌餉難於籌兵籌糧難於籌餉天下共知第奉
命之始專辦甘事專剿回逆而已嗣張捻巨股由豫竄
秦秦軍大挫賊燄頓張始奉

命先剿陝賊以局勢論必先秦後隴以賊情論必先捻

後回事理昭然無待詞費而秦中自漢回鑿斛以來積成浩劫論者謂西北遭禍最遲而受禍獨慘蓋較東南爲尤甚弟從東南而來證以所見所聞良不誣也見在捻回並熾西同鳳素稱腴郡旣已屢遭蹂躪滿目瘡痍北山各郡縣又以回匪陸續回竄及潰勇士匪源源而來擄殺幾無虛日官軍因餉賸饑疲情渙氣頽難期振作入秦以來詢及軍儲則司庫無數萬之存而各軍懸欠已十七八箇月留之固不能期其得力空言遣撤勢又不能詢及餉源則地丁徵收十不及一釐稅則素不

暢旺近因商賈罕至更復寥寥此種光景尋處亦有
所聞矣正擬聚擒逆東竄渭北連雨水漲之時悉銳攻
勦如天之福果能一鼓殲除滅此巨寇則當整兵西向
挑秦軍之銳者隨同節節進勦遣秦軍之疲者散令回
籍然後秦之軍與餉皆可移而之隴弟與閣下同辦一
事視秦與隴何有厚薄之分而局勢自有緩急辦事自
有先後則固不得不預爲籌及譬猶人家當窘乏之際
子弟急謀析產各營私窟者其家銷亡必速昆弟內外
共支門戶夜思早作刻苦撐持者其家道亦必漸次興

盛如初家與

國事同一理卽弟與老兄今日所處何以異乎弟處借兌洋欸尙未見到蓋由洋商有意居奇索取重息而山西票商因風鶴疊警不敢滙兌致有遲延前奉

諭旨飭在此項內酌撥恐尊處未能久待現飭將四川解到高軍門月餉三萬兩先撥交陳道丕業運解尊處并飭英臬司將餉捐一欸儘數起解聊應急需希飭彈收是幸米拉溝旣已得手玉公又恐撓撫議致干

廷詰弟竊意玉公似未免爲奸回所誤大抵回民願撫

亦未嘗非其本意然必我能勦然後伊可甘心就撫我誠心辦撫然後伊之就撫亦出誠心否則我以此聊示羈縻伊亦以此故相侮弄而已應如何處置覆陳希卽示知爲幸蘭垣標兵旣祇存二百餘名自可暫停招募一則節餉一則餉薄不能得好兵徒事虛糜並無實際現在用兵各省營兵缺額均皆停招甚有僅存營名並無額兵者閩浙兩江均如此卽陝甘亦然事勢所在不得不然想蘭垣尤宜照辦弟因秦事羈身一切偏勞費心照料殊抱不安凡有關繫各件如可從容處置者乞

隨時示及俾得竭其一得之愚並資練習是幸